

**Ka Jingdonkam jong ka  
jingpynshitom ia ki khun  
bad ka jingburom ia ki  
kmie ki kpa**

**To hikai ia u khynnah ha ka lynti  
ba u dei ban iaid, te ynda u la  
tymmen un ym kynriah noh  
na ka. Proverb 22:6**



## **Na ka bynta ki Kmie ki Kpa**

Ha khmih, ki khun ki long ka pateng U Trai: bad u soh ka kpoh u long ka bainong jong u.

Salm 127:3

Uta uba sngap ia la u diengduh u isih ia la u khun, hynrei uta uba ieit ia u u sneng ia u.

Proverb 13:24

Ha ka jingsheptieng ia U Trai ka don ka jingshaniah kaba skhem: bad ki khun jong u kin ioh ka jaka rieh. Proverb 14:26

Pynshitom ia la u khun katba dang don ka jingkyrmen, bad wat ai ba ka mynsiem jong me kan sngewlem ia ka jingud jong u. Proverb 19:18

Ka jingbieit ka shah teh ha ka dohnud khynnah; hynrei u diengduh jong ka jingpynbeit un beh noh ia ka sha jngai na u. Proverb 22:15

Wat khang ia ka jingsneng ia u khynnah, namar lada me shoh ia u da u diengduh, un ym iap. Men shoh ia u da u diengduh, bad men pyllait ia ka mynsiem jong u na dujok. Ki Proverb 23:13-14

U diengduh bad ka jingsneng ki ai jingstad, hynrei u khun ba la iehnoh ha lade u pynjah burom ia la ka kmie. Proverb 29:15

Pynbeit ia la u khun, un ai jingjahthait ia me; hooïd, un ai ka jingsngewbha ia ka mynsiem jong phi. Ki Proverb 29:17

Ki khun jong me baroh kin long kiba la hikai da U Trai; bad bakhraw kan long ka jingsuk ki khun jong u. Isaiah 54:13

Uba ieit ia la u khun u pynlong ia u bunsien ban sngew ia u rod, khnang ba un ioh jingkmien  
ia u ha kaba kut. Uta uba pynshitom ia la u khun un ioh ka jingkmien ha u, bad un  
sngewkmien ia u hapdeng ki paralok jong u. Uba hikai ia la u khun u pynsngewsih ia u  
nongshun, bad ha khmat ki paralok jong u un sngewkmien ia u. Wat la u kpa jong u u iap,  
hynrei u long kumba um shym la iap, namar u la iehnoh ia uwei uba kum ma u hi. Katba u  
dang im, u la iohi bad u la sngewkmien ia u, bad haba u la iap, um shym la sngewsih. U la  
iehnoh shadien ia u nongpynshitom bein ia ki nongshun jong u, bad uwei uba pynshitom  
bein ia ki paralok jong u. Uta uba leh palat ia la u khun un teh ia ki jingmynsaw jong u; bad ki  
dohnud jong u kin pynkhih ha ka jinglynniar baroh. U kulai bym shym la pynpra u kylla khlieh,  
bad u khynnah ba la iehnoh ha lade un long uba mon sngewbha. Lute ia u khun jong me,  
bad un pyntieng ia me: to ialehkai bad u, bad un pynlong ia me ban sngewsih. Wat rkhie lem  
bad u, ioh phin ioh jingsngewsih lem bad u, bad ioh phin khih ha kaba kut. Wat ai jinglailuid  
ia u ha ka jinglong samla jong u, bad wat pynkhih ia ki jingbieit jong u. Pyndem ia ka ryndang  
jong u katba u dang rit, bad shoh ia u ha ki tyrpeng katba u dang khynnah, ioh ba un kylla  
sting, bad un ym kohnguh ia phi, bad kumta un wanrah ia ka jingsngewsih ha ka dohnud jong  
phi. Pynshitom ia la u khun, bad bat ia u ban trei shitom, ioh ba ka jingleh be-ijot jong u kan  
long ka jingpynthut ia me. U Sirak 30:1-13

## **Na ka bynta ki khynnah**

To burom ia la u kpa bad ia la ka kmie, khnang ba kin slem ki sngi ha kata ka ri ia kaba U Trai U Blei jong me un ai ha me. Eksodos 20:12

Ko khun jong nga, wat niewbein ia ka jingsneng U Trai; lymne wat thait na ka jingsneng jong u: Namar ia uba U Trai u ieit u sneng; wat kum u kpa ia u khun ha uba u sngewbha. Ki Proverb 3:11-12

Ki pharshi u Solomon. U khun uba stad u pynkmen ia la u kpa, hynrei u khun uba bieit u pynsngewsih ia la ka kmie. Proverb 10:10

To sngap ia la u kpa uba la kha ia me, bad wat niewbein ia la ka kmie ynda ka la tymmen. Proverb 23:22

Ko khun, to kohnguh ia la ki kmie ki kpa ha U Trai, naba kane ka long kaba dei. To burom ia la u kpa bad ia la ka kmie; kaba long ka hukum kaba nyngkong ryngkat bad ka jingkular; Khnang ba kan bha ia phi, bad ba phin im slem ha ka pyrtnei.

Ephesos 6:1-3

To burom ia la u kpa da la ka dohnud baroh, bad wat klet ia ki jingsngewsih jong la ka kmie. Kynmaw ba la kha ia me na ki; bad kumno me lah ban siew kylliang ia ki ia kiei kiei kiba ki la leh na ka bynta jong me? U Sirak 7:27-28

Sngap ia nga u kpa jong phi, ko khun, bad leh hadien kata, ba phin suk. Naba U Trai u la ai burom ia u kpa halor ki khun, bad u la pynskhem ia ka bor ka kmie halor ki khun shynrang. Uno uno uba burom ia la u kpa u pynlong ka jingpynkhuid na ka bynta ki pop jong u: bad uta uba burom ia la ka kmie u long kum uba lum ia ka spah. Uno uno uba burom ia la u kpa un ioh ia ka jingkmien na la ki jong ki khun; bad haba u pynlong ia ka jingduwai jong u, yn sngew ia u. Uba burom ia la u kpa un ioh ka jingim kaba jrong; bad uba kohnguh ia U Trai un long ka jingpyntngen ia la ka kmie. Uta uba sheptieng ia U Trai un burom ia la u kpa, bad un shakri ia la ki kmie ki kpa, kumba shakri ia la ki kynrad. To burom ia la u kpa bad la ka kmie ha ka ktien bad ha ka kam, khnang ba ka jingkyrkhu kan wan ha phi na ki. Namar ka jingkyrkhu u kpa ka pynskhem ia ki iing ki khun; hynrei ka jingtim ka kmie ka pynkhyllem noh ia ki nongrim. Wat sngew sarong ia ka jingjah burom jong u kpa jong me; naba ka jingpynjah burom ia u kpa jong me kam long ka burom ia me. Namar ka burom u briew ka mih na ka jingburom u kpa jong u; bad ka kmie kaba khlem burom ka long ka jingkren bein ia ki khun. Ko khun, iarap ia la u kpa ha ka rta jong u, bad wat pynsngewsih ia u katba u dang im. Bad lada ka jingshemphang jong u ka tlot, to iaishah bad u; bad wat niewbein ia u haba me la don ha ka bor kaba pura. Namar ia ka jingiarap ia u kpa jong me yn ym klet: bad ha ka jaka ki pop yn pyndap ia ka ban tei ia me. Ha ka sngi jong ka jingjynjar jong me yn kynmaw ia ka; ki pop jong phi ruh kin sa rngad noh, kum u ice ha ka por ba shit bha. Uta uba iehnoh ia la u kpa u long kum u nongkren bein; bad uba pynbitar ia la ka kmie, u long uba la tim: na U Blei. U Sirak 3:1-16

Lada ngin pynshitom ia ki khun jong ngi, kin iam mynta hynrei kin sngewbha ha ki por ban wan. Lada ngim pynshitom ia ki khun jong ngi, kin sngewbha mynta hynrei kin iam hadien habud.

Ki khynnah ki long ka lawei jong ka ri jong ngi. Hynrei lada kin tymmen khlem ka jingpynbeit, kaei ka lawei jong ka ri jong ngi?

Baroh ki jinglong kiba sniew jong u briew uba la san ki long kito ki bym shym la pynbeit ne pynshitom ha ka por ba u dang rit. Ngi hap ban pynsan ia ki khun kiba sheptieng, kiba ieit bad kiba kohnguh ia U Blei.

Nga la shim ia kawei ka lyngkhot khyndew kaba im.

Bad da kaba jem u la pynlong ia ka man ka sngi.

Nga la wan biang ynda la dep ki snem.

Ka dei ka briew kaba nga peit.

U dang don kata ka jingpynbyrngia kaba nyngkong.

Bad ngam lah ban pynkylla ia u lano lano ruh.